



**Barat d'infurmaziuns tanter TESSVM e suprastanza cumünala**

La suprastanza cumünala es gnüda insembel cun Martina Stadler, directura da la TESSVM ad üna sezzüda d'infurmaziun. Id es gnü orientà e barattà infurmaziuns sur da progets passats, actuals e futurs.

**Refaziun sarinera Zernez (provisori) - surdatta da lavur**

Las lavurs da progettaziun e direcziun da fabrica pel provisorio da la biologia da la sarinera Zernez sun gnüdas surdattas al büro d'indschegner Caprez Ingenieure AG, Zernez.

**Contrat da prestaziuns - part supplementara**

Davart da la pulizia chantunala es entrà ün documaint per üna part supplementara al contrat da prestaziuns actual. Tenor decisiun da la regenza dals 22-09-2020 vegnan adattadas las indemnizaziuns invers il cumün in connex cun l'uorden dal trafic in cumün (ruhenden Verkehr). Il supplementaint al contrat da prestaziun es gnü acceptà da la suprastanza cumünala.

**Definiziun da la taxa directiva**

Tenor ledscha da seguondas abitaziuns ha la suprastanza cumünala defini la taxa directiva (Lenkungsabgabe) per l'on 2021 sün 300.00 chf per m<sup>2</sup>.

**Planisaziun da quartier Muglinè - facturaziun da cuosts d'infrastructura - decretaziun finala**

Infra il temp da recuors nu sun entrats ingüns recuors dals partecipats uschè cha la suprastanza cumünala ha decretà il scumpart da cuosts definitivamaing. Il proget da la planisaziun da quartier Muglinè ha cun quista decisiun pudü gnir serrà giò cun success.

**EW Zernez - fracziun da Brail - attach da forz'electric a l'ES S-chanf (Cumün da S-chanf) - contrat d'attach**

Als 13 schner 2021 es gnüda tachada intuorn la forz'electric da la Repower AG sün las Ouvras Electricas d'Engiadina SA. Per reglar la furniziun da l'energia electrica ma eir l'adöver da la rait tanter la transfuormaziun ARO e la transfuormaziun Brail faja dabsögn d'ün contrat d'attach tanter l'ES S-chanf e l'EW Zernez resp. tanter ils duos cumüns da S-chanf e Zernez. Il contrat es gnü approvà.

**Charta da genituors a regard il futur da la scouline da Lavin**

La suprastanza cumünala ha surgni üna charta regard il futur da la scouline a Lavin. Il giavüsche da quista charta es da reponderar la decisiun da schogliar la scouline a Lavin e da pussibilitar eir amo l'on scolastic 2021/2022 a Lavin. In suprastanza es quista tematica gnüda trattada. La suprastanza cumünala es da l'avis cha la situaziun dess amo üna vouta gnir spiegada e discutada culs pertocs. Per la suprastanza fetscha in avegnir sen d'avair la scouline centrala a Zernez.